

# Debattas denter dretg e seniester

La scola mercantila ha envidau ad ina scuntrada cun candidats dallas elecziuns dil parlament federal

■ (sib) Per svegliar igl interess dils scolars per las elecziuns dil parlament federal ha la Scola mercantila Surselva envidau tschun candidats ed ina candidata ad ina discussiun. Il gliendisdis suentermezdi han ils exponents da dretg tochen seniester debattiu vivamein a Glion. Silla gliesta dils envidai era spir prominents dalla politica grischuna: ils socialdemocrats Peter Peyer ed Andreas Hämmerle, Sep Cathomas dalla pcd e Brigitta Gadiant e Hansjörg Hassler dalla pps. Sulettamein il liberaldemocrat Christian Rathgeb che candidescha per il cussegl dils stans sto ins quintar sco noviz sil plaun politic federal. Il giurist da Cuera ha lu era concediu ch'ei seigi bein l'empreda, denton probabel buca la davosa gada ch'el candideschi pil parlament. Ils candidats han tuts saviu sepresentar cuortamein avon che la moderatura Rafaela Candinas ed il moderatur Andriu Hosang han priu ils politichers sut la marella cun damondas ch'els han mo astgau rispunder cun gie ni na.

## Serrar la scola da tgira

Entginas gadas ein tuts stai dil medem meini, tuts han per exempel approbau da baghegiar ora il traffic public era el cass che quel ei deficitar. Autras respostas han provocau la discussiun. Andrea Hämmerle e siu schef da partida Peter Peyer han omisus detg ch'els veglien serrar la Scola da tgira a Glion. Sinaquei ha il na da Hansjörg Hassler provocau applaus. Il president dalla ps grischuna ha argumentau ch'il Grischun stetti el futur en concurrenza cun il cantun Turtig e S. Gagl puncto scola da tgira. «Sche nus stuein sedumandar sche nus havein el futur insumma aunc ina scola da tgira el Grischun astgein nus buca haver ina concurrenza da differentas savens enteifer il cantun», ha el detg. «Plinavon ei Glion buca in liug ideal per ina tala scola, las



Els han debattau davart tematicas brisantas che pertuccan la Surselva: Andrea Hämmerle, Peter Peyer, Sep Cathomas, Brigitta Gadiant, Hansjörg Hassler e Christian Rathgeb (da seniester). Davontier ils moderaturs Rafaela Candinas ed Andriu Hosang. FOTO S. BUNDI

biaras pussevildads d'absolver in practicum ei buca en Surselva.»

## Rinforzar il scalem ault

En caussa gimnasi inferior ei siu collega da partida Andrea Hämmerle staus il sulet che ha fatg valer ch'ins dueigi abolir il gimnasi inferior. «Sche nus havein dapli scolars els scalems aults savein nus rinforzar quels. Quei vala dapli che mantener ils gimnasis inferiori ch'eiin savens meins decentrali.» Plinavon ha el buca schau valer igl argument d'in auditur ch'ei detti senza gimnasi inferiori

dameins plazzas per glied qualificada. Era la scola secundara porschi talas plazzas, ha Hämmerle detg. Sep Cathomas ha buca schau valer quei. El ha fatg attents ch'il model C ch'ins vul introducir per rinforzar il scalem ault seigi strusch realisabels el territori muntagnard ed ha prognosticau: «Sche nus mantenin buca il gimnasi inferior, vegn ei a dar gimnasis sin basa privata ch'eiin bia pli cars.» Christian Rathgeb ha detg ch'il gimnasi inferior seigi in factur essenzial per famiglias che vegnien a star da niev en Surselva.

## Porta Alpina:

### Il tren ei staus eri

Fatg surstar ils presents ha era la posiziun da Andrea Hämmerle che la Porta Alpina vegni sche insumma lu per baghegiada dad ina dallas proximas generaziuns. «Il cussegl federal ei sedecidiu da treer alla liunga il project. Politicamein stat la Porta Alpina graderi, mo negin che di quei alla glied.» Christian Rathgeb ha fatg attents ch'els Grischuns stoppien sedumandar co far lobbying a moda pli efectiva, quei che Brigitta Gadiant ha relativau schend

ch'ins hagi gia fatg in pass impurtont cun perschader il parlament da votar pil credit per las preinvestiziuns. Dil tuttatfatg nuncapeivel ei stau per ella ch'ins hagi oriundamein vuliu il tunnel niev tras il Gottard e vitier il tunnel tras il Lötschberg per motivs dalla politica regionala. «Ussa pretendan las Viasfier federalas ch'igl entir menaschi detti ensemen sch'ins tarmetti in tren regional tras in da quels dus tunnels.» Ella detti en scadin cass aunc ditg buca si la Porta Alpina. Sep Cathomas da sia vart ha puntuau che la Surselva sappi buca insister en perpeten sin la Porta Alpina. «La Regiun Surselva ha schaffiu novas structures ed ha aunc auters projects sin rucca.» In da quels seigi il Parc Adula.

## La pps sto sedustar

Empau sut squetsch ein Hansjörg Hassler e Brigitta Gadiant vegni cu ils moderaturs han mussau il placat actual dalla pps per l'iniziativa che vul metter al cunfin jasters delinquenti. Mirond sil placat cun treis nuorsas alvas che stauschan ina nuorsa nera giu digl uoppen svizzer ha Hansjörg Hassler accentuau ch'il stil dalla pps svizra plaigi tuttaviva buca adina ad el. Christian Rathgeb ha manegiau che la gliedud che descrivi aschi semper ils problems patratgi era aschi semper, quei ch'il publicum ha rispundiu cun applaus. Hansjörg Hassler ha aunc inagada puntuau ch'el e Brigitta Gadiant seigien sedustai encenter il stil dil placat ed hagian buca sutscrit il «contract cul pievel» ch'ei staus sco inserat el las gasettas. Els dus hagian buca adina il medem meini sco la partida mumma. Sinaquei ha Peter Peyer aunc sittau inagada neu da seniester: «Igl ei bien ed endretg, sch'els representants dalla pps grischuna voteschan auter a Berna che quels dalla pps svizra. Igl ei denton fatal, sche quei effectuescha nuot en lur fracziun.»

# Purschida engrondida e cefras neris

La Scuntrada e formaziun Surselva ha rinforzau sia posiziun

■ (sib) Il davos onn ha la Scuntrada e formaziun Surselva (SFS) saviu rinforzar sia posiziun cun cuors tradiziunals e lavur sin incumbensa d'instituziuns e fatschentas. El futur vul l'organiziun da non-profit denter auter porscher dapli el sector da commerci e mistregn e restar ellas cefras neris. Tut en tut ein 1890 personas separticipadas igl onn da quen 2006/2007 dils programs dalla SFS. Da quei ein «mo» 520 participonts stai als cuors tradiziunals dalla SFS sco ils cuors da computer, cuors da lungatgs ni era ad ina introducziun ella cumpra e vendita egl internet cun eBay. Tier il grond rest s'audan differentas lavurs sin incumbensa da tiazas personas. Quei ei per exempel la realisaziun da cuors e referats egl entir Grischun per Scola e famiglia Grischun ni scolaziuns per l'Associazion dils cussegls da scola dil Grischun. Leutier ha la SFS purschiu seminaris d'economia ensemen cuagl Agid svizzer per las muntognas e la Regiun Surselva. Tals vul la SFS era porscher igl onn proxim ed amplificar la purschida cun cuors el sector mistregn/administratiun. Plinavon vul l'organiziun realisar dapli referats, workshops e seminaris da tematicas actualas.

## Finanzas saunas

Era la promoziun individuala per affons e giuvenils vul la SFS rinforzar. Ina da quellas purschidas ein las jamnas d'empreda che la SFS ha menau tras questa stad l'empreda gada. Cheu sco era els



Il gestinari Martin Mathiuet e la responsabla per finanzas e persunal Marina Cavelti ein cuntents cul svilup dalla Scuntrada e formaziun Surselva. FOTO S. BUNDI

biars auters cuors ha l'organiziun engaschau docents e referents giuvenils per garantir a liunga vesta ina cuntinuitad dalla qualitat. «Da principi havein nus fatg excellentas experienschas cun nos students», ha il meinagestiu Martin Mathiuet puntuau. El ha denton era concediu che mussaders giuvenils pretendien dapli controlla dalla vart dalla SFS. Grazia ad in management da cuosts strict eis ei reussiu uonn l'empreda ga dapi che Martin Mathiuet ha surpriu la SFS igl onn 2001 da scriver cefras neris. «Quei grazia a nos sponsurs ed oravontur a nos

insements el program da cuors», ha Martin Mathiuet declarau. Damai ch'els avieschien buca in gudogn seigien els praticamein pli bienmarcau che la Migros Klubschule. Martin Mathiuet: «Ina da nossas fermezas ei era che nus organisein tut ils cuors nua ch'els ein dumandai.»

## Grondas sfidas ella regiun

Sco scol'aula populara fa la SFS part dall'unioni Formaziun Bildung regiun Surselva. L'unioni propona Martin Mathiuet per il departament «formaziun e cultura» che la Regiun Surselva duei ob-

tener suenter sia restructuraziun igl onn proxim. «La digren dil diember da scolars ed il squetsch finanziel dil cantun vegnan a procurar che nus perdin ina scola suenter l'autra ils proxims onns», ha Martin Mathiuet prognosticau. Perquei seigi ei decisiv da restructurar la scolaziun en Surselva egl intern, denton era anoviars per aschia influenzar il svilup sil plaun cantunal. «Buc in soli patrun en Surselva ha in pli grond volumen da pagas che las instituziuns da scola», ha Martin Mathiuet fatg da saver. Per mantener quei seigi ei indispensabel d'optimar il menaschi.

## ■ CUERA

### Gion Schwarz candidescha a Cuera

(mc) Per las elecziuns dil cussegl da vischnaunca (legislativa) dil marcau da Cuera che han liug igl onn 2008 candideschan per la pcd ils cussegliers en uffeci Luca Tenchio, Gieri Derungs, Fred Bieler e Lionella Maria Zanolari. La pcd da Cuera va denton ella offensiva e presenta ina gliesta cumpleta da 21 candidats. Denter prominents e meins prominents secatta era igl anteriur president dil cussegl grond Gion Schwarz da Mustér ch'ei secasaus a Cuera e diregia leu la gastronomia dalla residenza da seniors el Benerpark. Silla gliesta figureschan plinavon: Romano Cahannes, Claudio Casutt, Donat Deplazes, Patrick Durisch, Patricia Giger-Capeder, Reto Kühnis, Carla Maisen, Sandro Paganini, Sandro Peder, Olivier Pernet, Giancarlo Sala, Stefan Schittenhelm, Marianne Sieber-Mäder, Robert Spreiter, Matteo Tuena ed Orlando Adriano Vasella.

Cun acclamaziun ei Emil Anton Räber vegnius nominau sco vicepresident dalla Dertgira districtuala dalla Plessur e Beni Peder sco derschader districtual dil medem tribunal.

Suenter che Lionella Zanolari ha giu presentau il project dalla piazza da glatsch planisada silla piazza dalla Quadra ha la radunonza generala dalla pcd da Cuera decidiu da recumandar al suveran da refusar quei project ella votaziun dil pievel che ha liug ils 9 da settember. Il resultat dalla votaziun interna ei staus 17 na, 14 gie e 5 abstenziuns.